

■ GLOSSA

Patenta, patronas e passiuin

DA SILVIO CAMENISCH

Halali. Pif! paf! pumfatè! Sin giavisch da pliras varts vom jau il teolog e scrivent quest onn a chatscha. Sin giavisch da pliras varts vom jau il vicari general quest onn a chatscha. Uss ha ella tschiffà nus teologs chali-rads da dadens anor, la sontga chatsch'auta grischuna, uss mora la speranza per nus selvaschinas libras u predas levas per mintga chatschadur(a) cun ina buna arma, cun montà vidlonder in zetef uschia. Da survegnir avant e durant tar Vossa fatschenta d'armas da mintga caliber Vasella; nus na laschain or nagins calibers; cussegliazium individuala professionala.

Hai jau il vicari general in summa mess en mia patenta, en cas dals cas che jau stuess mussar ella a l'autorità? Jau di intenziunadamain Obrigkeit; chapeschan las pitschnas etnias ruman-tschas en evidentia agonia, mistifitgada e penibla er meglier. En la giuvna litteratura rumantschaetudestga en il medem corp (androgina? bi? transa? er egal) fan ins uschia. Uss vegn ins encunter fitg a noss basegns fitg fitg particulars, finden Sie nicht auch? Ich auch. Uschiglio: nus essan sensibels. Nus essan sensibels.

Sacra mazzacra, hai jau scumprà en avunda patronas, sin giavisch da pliras varts, sa dumonda il chatschadureteolog passiuinà. L'adversari chatschadureteolog na dorma gea betg, quel brischa en ses chalzers da viandar da chatscha auta grischuna, der brennt in seinen Bündnerhochjagdreise-



schuhn, dad ir e turnar cun in Knopfspieser «Ursicin I.» uschia e mussar e cun tge luschezza! avant las ustarias u chapluttas. Nus schain intenziunadamain Knopfspieser al buttaner «Ursicin I.»; chapeschan noss amis sensibels er meglier ed han insatge giudlonder. La sensibladad, ella è gronda, è noss pli grond capital.

Uss hai jau chatschadureteolog en il medem corpus delicti, na, betg delicti, mo corpus, jau hai studegià e doctorà en tuts roms e deplorablamain er en teologia, neve, penderlà enturn vita tschintas tut a dubel plain patronas, cun la sfida, cun la spida sin bucca ed en bucca e sut la bucca, da far giu sin giavisch da pliras varts, jau na stoss betg dir en il Forum romanum da la Diana, na, Quotidiana, quantas varts, neve, il tschierv da curuna «Martin I.» Pumfatè. La preda uschia insatge sco leva, ella è morta, cun sang sin bucca ed in aspergel da pign u da tieu en bucca, ord ferm respect, segir betg suspect! da l'act da mazzar, vegn glorifitgada, lobgepreist, ed intschensada sco iconas en la litteratura.

Betg in pauet mistificaziun bunamain penibla, betg? Lura ma perstgis jau, savais, jau sun plain dubis en causa Patenta, patronas e passiuin celebrada sco mai uschia, grazia a las medias, las medias! Istorgias, forums, impuls da chatscha. Docu-serias da la chatscha. Il salid da chatscha. RR tschertga la preda, ella è morta. Fa nagut. La vita na vegn betg prendida, mo midada tar las selvaschinas, essan nus chatschadurs e teologs almain unids, ed ils levcartents crain er, jau er insaco, nu'è il problem?

Il maister chatschadur e la preda morta duessan vegnir inoltrads cun foto. In'emprima giuria d'experts, ina segunda giuria d'experts... ah Vus savais schon, tschertga adina la meglra preda. Jau na vules betg, murir, ma en m'annunzia da mort, en La Quotidiana betg pli mo catolica ed uschiglio nagut, averta a tuttas persvasiuns e previsiuns, sorry, er la mia, vi jau esser fotografà giu cun mia meglra preda!, penibel n'è quai betg, wieso? Cun mia mendra preda na stoss jau betg esser!, stoss jau retg Juan Carlos I. fitg fitg passiuinà chatschadur ordaifer chasa avunda en l'album da famiglia cun mia Sofia. E ti er, collega retg Carl XVI. Gustaf.

Mes success u er betg sin chatsch'auta (Hochamt) e pli bassa è enormamain dependent da mia Patenta, patronas, passiuin e missiuin. Also, chars chatschadurs, guardar che nus hajan pachetà en tut, emblidà nagut.